



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim tir_yimiyim

tir yimiyim TAPAK 6

Strait of Hormuz nung mines yutsüba
rong tem amaktsü tuyuogo: Trump

Assam: Punjab Police-i MP
Amritpal Singh puogo



VOL. XXIII ISSUE NO. 190 (ADOK 190) DIMAPUR ROGONÜ (FRIDAY) RONGCHII (APRIL) 24, 2026

₹ 5.00

HSLC aser HSSLC tatidang nung takok angurtem tushir

Kohima, Rongchii/April 23 (TYO): Nagaland Angh Nand Kishore Yadav-i HSLC aser HSSLC examinations 2026 nung takok angur ajunga nem tenüngsang agüja liasü.

Angh-i parnok maneni takok angutsü moatsü aser tarutsü wadang ajunga nung tajungtiba asoshi meranga inyaktsü ayongzük.

Nagaland Chief Minister Dr. Neiphiu Rio-ia takok anguba ya kaketshirtemi bendanga agütsüba, meranga inyakba aser tezütanga maliba kuli lir, ta ashi. Pai tamakok ajururtem dang teimla mesamai meranga azüngtsü ayongzük liasü.

Deputy Chief Minister Yanthungo Patton aser Member of Parliament (Rajya Sabha), Phangnon Konyak natia tepela lemsatepa liasü.

All Nagaland College

Students' Union (ANCSU)-ia HSLC aser HSSLC Examination 2026 nung takok anguba kaketshir ajunga den tepela lemsatepa liasü.

Nenok dak jeret-peret aliba, temulungtetba aliba aser bendanga agütsüba ajanga kaketshir aser Nagaland state dangi konang tetushi bener arutsüogo, ta ashi.

Tatishitsü tajung sayuteta takok anguba temaitsü aser state telungzük nung higher education tejakleni odaktsütsü temulungtetba nung special sponsorship sentong ka ANCSU-i sangdongogo.

Iba sentong kübok HSSLC examination nung Arts, Science aser Commerce stream shia nungi first rank holders indang admission sponsor asütsü.

(Maneni tapak 2 nung...)

Nirmal Jain ken o nung DNSU-i takok angur

Dimapur, Rongchii/April 23 (TYO): Dimapur Naga Students' Union (DNSU)-i kanga meranga bushiba sülen 2002 küm Nirmal Jain nem Non-Naga Indigenous Inhabitant Certificate agüja aliba Dimapur indang Deputy Commissioner-i agentsüogo, koba ashikülak mapa inyaka meshi ta ashi.

Iba certificate ya ozüing alema meshi ta DNSU-i 2025 küm June ita ashishitep tenzükba ajanga bushisingdangba sülen DC-i iba totuyuba ya Brehostibarnü agütsü.

Iba dak sendakba nung internal inquiry committee ka July 2025 nung tenteta bushisingdang tenzük aser 'documentary evidence' aser certificate kiburi telangzüba agütsübatem asadanga liasü.

Iba mapang parnoki Jain

tsüraburtem 1964 electoral roll indang records nung sendaktepba nung meshidak aliba ngutet, koba nung ajemdaker certificate ya agüja liasü.

Electoral roll entry nung Jain tebu ya "Balchand Jain, son of Nantgram," ta shia lir saka certificate nung pa tebou tenüng ya "Hazari Mal" ta shia aliba parnoki ngutet.

Jain yagia 1964 records nung shia alisang ya shibar junga mejangjatet.

Item kulitem ajanga certificate ya tim masüba lenmang nungi meshi ta committee-i jangjatet.

Anungji 'certificate bearing Registration No. 97 dated March 14, 2002' ya tang nungi 'null and void' alitsü aser ozüing tsütsü temeden kecha mali, ta DC Dimapur-i metetdaksü.

NBSE-i HSLC & HSSLC results sangdongogo: Private schools temsa tajungba

Kohima, Rongchii/April 23 (TYO): Nagaland Board of School Education (NBSE) ajanga Brehostibarnü High School Leaving Certificate (HSLC) aser Higher Secondary School Leaving Certificate (HSSLC) Examinations 2026 indang results sangdongogo, kong Class 10 tera tajungba sayur aser Class 12 kanga agi tajungba lir.

Taküm HSLC tatidang nung kaketshir 22,765-i agütsüba nungi kaketshir 16,406-i takok angu aser overall pass percentage ya 72.07% alitsü, koba 2025 küm 71.87% liasü.

Private school temi maneni amokbanga taküma pass percentage 86.13% lir aser government schools tem 43.26% alitsü. Repeaters tem pass asüba ya shilem 12.85 liasü.

Categories ajunga nung teburtem dang nungi tetsür temi tajungba pass asü. Government schools tem nung tetsür pass percentage ya 43.95 liasü aser tebur percentage 42.20 liasü. Private school tem nung tetsür pass asür shilem 88.70 aser tebur shilem 83.42 liasü.

HSLC tatidang nung tematiba jenjang ya MGM Higher Secondary School, Dimapur nungi Aman Kumar alitsü, shibai marks 590 (98.33%) nguteta NBSE Topper Award aser Governor's Gold Medal angutsü.

Pa sülen Olympic Higher Secondary School, Zunheboto nungi Sudhanshu Kumar-i 98.00% aser tasembuba jenjang ya Holy Child School Dimapur nungi Shreya Singh aser Isaiah Ability Higher Secondary School, Wokha nungi Benchumo Tungoe nati tongtet aser tenaprongi marks shilem 97.67%

Technical timtem mechi HSLC & HSSLC results jelia sangdong

Dimapur, Rongchii/April 23 (TYO): Nagaland Board of School Education (NBSE) ajanga Brehostibarnü sangdong ka nung, NBSE-i agiba HSLC aser HSSLC Examination 2026 indang results sangdongtsüba dak sendakba nung April 18, 2026 nü sangdong ka agüja aliba melenshia April 23, 2026 nikingdang sangdongogo, ta ashi.

'Timer' dak sendakba nung

technical timtem ka aliba mechi yamai inyaktsüsa akum.

Ajisüaka April 18, 2026 nü sangdongba ama documents meshitsü anogobo kasa alitsü aser website nung provisional Marksheet ya April 24, 2026 nü agütsütsü, ta ashi.

NBSE nung resgister süa aliba Heads of Institutions ajunga dang iba temelenshi metetdaksür, ta NBSE-isa ashi.

ngua liasü.

Top 80 rank holders rongnungi kaketshir 79 (98.75%) ya private schools nungi aser government school nungi Sreeniti Mahapatra (Government High School, Yachem) kisüing alitsü.

Toppers shilem 55 bo Dimapur aser Kohima nungi lir aser districts pezü nungi top ranks nung kata meliasü.

HSLC nung ama HSSLC tatidang nunga tetsür temi tajungba pass sütet aser streams ajunga nung government schools dang nungi private schools temi tajungba alitsü.

Taküm HSSLC examination nung overall pass percentage ya 85.46% alitsü, koba 2025 küm pass percentage (82.44%) dang nungi shilem 3.02 agi tajungba lir.

Arts stream nungi taküm HSSLC tatidang agütsür kaketshir 11,594 liasü aser takok angur kaketshir 9,945 (85.78% pass percentage) liasü, Science stream nung kaketshir 2,749-i tatidang agütsüba nungi takok angur kaketshir 2,355 (85.67%) alitsü aser Commerce stream nung kaketshir 1,125-i tatidang

agütsüba nungi takok angur 919 (81.69% pass percentage) alitsü.

Temelenshi tulutiba ya Science stream nung liasü, kong taoba küm dang nungi shilem 9 dak tema agi timba takok angu.

Arts stream nung Northfield Higher Secondary School, Khikha, Kohima nungi Keleno Thorie-i marks shilem 96.80 nguteta tematiba jenjang tongtet.

Commerce stream nung Pranab Vidyapith Higher Secondary School, Dimapur nungi Shreya Debnath-i 96.00% ngutet.

Science stream nung St. John Higher Secondary Residential School, Dimapur nungi Menguhaankum Chang-i marks shilem 95.60 nguteta tematiba jenjang angu.

NBSE-i HSLC aser HSSLC indang marksheets ya May 1-5, 2026 anogotem lemsütsü ta metetdaksüogo.

Kaketshir temi anogo 15 tsüngta rescrutiny atema apply sütettsü aser compartmental aser improvement examinations ya June 2026 nung agitsü aser applications ya May 11-16, 2026 anogotem agütsütettsü.

Nagaland BJP Mahila Morcha-i Jan Akrosh Padyatra ayonga agi



BJP Mahila Morcha, Nagaland-i Brehostibarnü Jan Akrosh Padyatra (Women's public outrage march) ayongzük agiba mapang tangokba noksa angur. (Dimapur, April 23, 2026)

Dimapur, Rongchii/April 23 (TYO): BJP Mahila Morcha, Nagaland-i Brehostibarnü Jan Akrosh Padyatra (Women's public outrage march) ayongzük agiogo. Opposition party temi Parliament nung Women's Reservation Bill nokdangba anema parnoki iba sentong ya ayongzük agia liasü.

Brehostibarnü DDSC stadium nung rally ka ayongzük agiba mapang BJP Mahila Morcha tir Tsachola Rothrong-i ashiba agi, politics ya nüburtem tenzüksü atema asütsüla aser opposition-a ta ser anema nokdaksüba atema dang masütsüla. Iba bill anemba ajanga linük nung tetsürtem akoksdaktsüogo, ta ashiba den

parnoki parnok aibelen angatettsü ta amangba lemsatet.

Nagaland atema iba Bill ya agizük asübo Lok Sabha menden talila ka ngula aser Assembly menden 60 aliba nungi 90 kümla. Iba ajanga tetsürtem nem maongka tali agütsüla. Ajisüaka opposition party temi parnok tejangraba

nem anidakja iba lenmang ya shibangtsüogo, ta lai shisem.

Tetsürtem nem taliba shilem agidakja tashi tali agütsütsü Union sorkar nukjilding liaka bill agizüktsü asoshi parliament nung majority monguteti liasü. Iba bill ajanga Parliament menden 850 kümdaktsütsü benoker liasü.

Tanü asüngka social media nung 33% reservation aser delimitation ken o dak sendakba nung mongintem aika adokogo. Parnok tebilembatem balala lir aser iba ajanga nüburtem mangmangdaksür. Onok tebilemba jangja jangja rasa ashitsü asoshi tanü iba rally ya ayongzükogo, ta laisa shisem.

MCCI-i kitsükirong lendong nung akoksar alirtem nem senotsü teyari agütsü



MCCI ketdangser & kitsükirong lendong nung akoksar alirtem den külemi tangokba noksa nung angur.

Dimapur, Rongchii/April 23 (TYO): Mokochung Chamber of Commerce and Industry (MCCI)-i Brehostibarnü, April 21 nü Mokochung kübok MMC Complex anasa Dilong Ward nung kitsükirong lendong nung akoksar alirtem nem senotsü teyari agütsüo.

Teyari agizükertem rongnung establishment ajunga rongtokba shishilembar ti aser ano takoksa terara ajangshir shishilembar parnok pezü densema lir.

Shishilembadak ajunga rongtokba nung paan dokan pezü, electronics repair centre ka, theological library ka, NGO office ka aser restaurant ka densema liasü. Terara takoksa ajangshirtem rongnung poksüngdak ka, süoshi ayokba dokan ka aser bakery ka densema lir.

Teyari agizükertem den o jembiba mapang MCCI tir Tsukti Longkumer-i, iba lendong

atalokba atema kanga sasa bilemba lemsatep, aser parnok dang temulung majemtsü, saka taoba mapang dang nungi temerangba inyaksü ajungshi.

Pai ashiba agi, asenoki metetba lendong timtemtem ajangshitsü aser item ya asenoki mazioktetsü, saka shibai item ya kochteta odir parnokji peisasa aziokteta lir ta ashi. Paisa, beneficiary tem dang tebilemba tajung nung maneni tejakleni aotsü ajungshi.

Maneni pai, MCCI ya shishilembaba lokti tentet tejangraba ataloktsütsü aser tajangzük asoshi amenok ta shia, züngsemtem longjemmer alitsü ayongzük. Paisa, MCCI-i jongdak mapang züngsemtem atema jenjang balala agiba indang lemsatep aser ashiba agi, lenla balala nungi tetsüdaksü balala ajangshiba mapang MCCI-i masetshi-i nokdaker.

MCCI tir yagi, Mokochung

ya tanübo Nagaland nung shishilembartem atema tajungtiba jila ka lir ta ashi. Pai ashiba agi, iba ya MCCI-i jila nung rakzükkradem anema nokdakba ajanga lir. Jila timba ka nung ama masü MCCI-i Naga nung yimden yimsüsüba tsütsü telok balala nem shishilembartem dang nungi saru sarutsü memelar, ta pai ashi.

Shishilembartem dang kanga pelaba lemsatepba mapang pai, Arkong Ward nung HDFC Bank opposite nung tang yanglua aliba MCCI ki ya yakta renemtsü ta ashi.

MCCI tiri, iba ki asütsü atema ali aliba aser ki yangluba ajak ya züngsemtemi tenla agütsüba ajang lir ta ashiba den MCCI ya Nagaland nung pei office den commercial building ka yangluba mezüngbuba district chamber of commerce and industry akümtsü, ta shisem.

AESL aser Indian Army na tenangzüktepba yanglu



Army personnel aser parnok kibongtem nem teyari agütsütsü atema Colonel, Ceremonial & Welfare, Indian Army, aser Chief Academic & Business Head, Delhi-NCR, AESL, Delhi Dr Yash Pal nati sign tenangzüktepba nung sign asüba mapang tangokba noksa nung angur

Dimapur, Rongchii/April 23 (TYO): Army personnel aser parnok kibongtem nem teyari agütsütsü atema Aakash Educational Services Limited (AESL)-i Indian Army den Memorandum of Understanding (MoU) ka nung sign süogo.

Tenangzüktepba kübok AESL-i PAN India centre aser branch tem nung parnok indang course agütsü atema züngoksemnüba Indian Army kaketshirtem nem tajangzük agütsütsü. Iba tenangzüktepba nung Colonel, Ceremonial &

Welfare, Indian Army, aser Chief Academic & Business Head, Delhi-NCR, AESL, Delhi Dr Yash Pal nati sign süa liasü.

Tenangzüktepba ya Indian Army personnel aser parnok kinungertem ajangzükdaksütsü atema lir, kong linük ajunga nung AESL centre tem nung course balala agütsü atema scholarships agütsüba densema lir.

Iba scholarships ya AESL indang tang benoka aliba scholarship program tem den ano bendenloksemba lir, koba admission agütsü atema

jangraba kaketshir ajak atema lir.

MD & CEO, Aakash Educational Services Limited Chandra Sekhar Garisa Reddy-i ashiba agi, Indian Army den longjemba ajanga parnok kinungertem nem jenjang tajung shisaluyim agüja tasütait sepaitemi linük asoshi parnok taküm bendanga agütsüba tushir. Scholarships balala ajanga sepaitem chirnurtem parnok nükjidong tongtetdaksütsü meranger, ta paisa shisem.

P&AR department-i keno jangjashitsü

Dimapur, Rongchii/April 23 (TYO): Department of Personnel and Administrative Reforms, Nagaland-i 02/02/2016 nü Indigenous inhabitant of Nagaland atema Certificate agütsüba dak sendakba nung

osang agütsür aliba tera melenshiba metetdaksüo. Iba osang para 1 nung "In supersession" ta amshia aliba ya "In pursuance" ta metongshia amshitsü metetdaksüo.

HoD tem training & sensitization sentong May 6 nü agütsü

Dimapur, Rongchii/April 23 (TYO): Finance Department, Nagaland-i sangdong ka ajanga Head of Departments (HoDs) tem asoshi anogo ka atema training aser sensitization sentong May 6 nü Capital Convention Centre, Kohima nung agütsü ta metetdaksüo.

Control of Expenditure, Audit Procedures, Financial Sanctions, Pension & Establishment ken o, National Pension System (NPS), Contract Management aser SNA Sparsh densema lir.

Administrative aser rongsenketzung dak sendakba nung tongtibang onüktem jangja lidaksütsü nükjidong nung iba training sentong ya ayongzükogo. Training mapang onük balala ayimjema agütsü, kong Budget Management,

HoD tem ajak dang iba training sentong nung senior officer ka den aru adentsü asoshi mepeshia metetdaksüo.

Maneni ketdangsurtem dang tenung züngoksemtsü atema training agütsüba tesem anepdang 9:30 ako tashi nungbo tonga arutsü metetdaksüo.

HSLC aser HSSLC tatidang ... (TAPAK 1 NUNGI...)

Nagaland state telungzük nung higher education azüngtsü tejangraba aliba toppers asem nem iba sponsorship ya agütsütsü, ta ANCSU-i ashi.

agünura, ANCSU den email ancunag@gmail.com, H Tunato Achumi, Education Secretary (7629045533) aser Sotilo Tep, General Secretary (9863779559) ajanga admission dak sendakba nung tongteprateptsü akok, ta sangdong ajangasa ashi.

Mokokchung nung Poshan Pakhwada 2026 tembangogo



DC Mokokchung, Ajit Kumar Verma aser ketdangsurtem Poshan Pakhwada 2026 shibangba sentong nung shilem agiba mapang tangokba noksa nung angur.

Dimapur, Rongchii/April 23 (TYO): Poshan Pakhwada 2026 shibangba sentong April 23 nü DC's Conference Hall, Mokokchung nung Department of Social Welfare, Mokokchung-i ayongzükaga agiogo.

Integrated Child Development Services (ICDS) shilem indang lemsatep aser ASHA aser Anganwadi worker ajak dang parnok centre tem tajungba ketdang asütsü ajungshi.

Iba sentong ya April 9 nü "Maintaining Brain Development in the First 6 Years of life" omen nung ajemdaker tenzükaga liasü.

Sentong nung Mokokchung Deputy Commissioner-i, Changtongya ICDS Project kübok Changtongya Village Centre (C) nungi Anganwadi Worker, Sashilemla, Mangkolemba ICDS Project kübok Anungchen Centre, Khar Village nungi Anganwadi Worker Lanusangla na nem Best Performing Anganwadi Worker award agüja liasü.

Sentong nung o jembiba mapang Deputy Commissioner Mokokchung, Ajit Kumar Verma, IAS-i, scheme aser policy balala kübok inyakyim balala takok ngua benoka inyakba atema Department kübok mapa inyakertem aser ketdangsurtem nem tenüngsang agütsü, aser lokti ajangzükdaksütsü atema kasa tanüla mesamai maneni inyaksü ajungshi.

Iba sentong ya Supervisor, Ongpangkong North Arienla lenisüba nung agi aser Imliyangner District Program Officer, ICDS-i lokti pela agizükba o jemi, Ongpangkong North CDPO Meyalemla-i 8th Poshan Pakhwada 2026 indang metetdaksü aser CDPO Ongpangkong South Sunepwapang-i tepela o jembia liasü.

Bengal nung voters shilem 90 aser TN nung shilem 82-i vote agütsü



April 23, 2026 nü West Bengal nung assembly election mezüngbuba shilem agiba anogo nung Asansol nung Asansol constituency nungi BJP candidate, Agnimitra Paul-i vote agütsüba sülen tangokba noksa nung angur.

New Delhi, Rongchii/April 23 (Agencies): Brihostibar nikongdang 5:00 ako tashi nung West Bengal nung voters shilem 89.93 aser Tamil Nadu nung voters shilem 82.24-i vote agütsüogo, ta Election Commission of India (ECI)-i metetdaksü.

Talisa West Bengal nungbo district teimbaka nung voters shilem 80 dak temai vote agütsüogo, ta kasa osang ajanga metetdaksü.

Brihostibarnerp Tamil Nadu nung assembly constituencies 234 aser West Bengal nung assembly constituencies 152 nung election agi. May 29 nü Bengal nung election tanabuba shilem agitsü aser May 4 nü vote azüngtsü.

West Bengal kübok

Dakshin Dinajpur nungbo voters shilem 93.12-i vote agütsü, Cooch Behar district nung voters shilem 92.07, Birbhum nung shilem 91.55, Murshidabad nung shilem 91.36 aser Jalpaiguri nung shilem 91.20-i vote agütsü.

Bengal kübok Jhargram nunga voters shilem 90.53 aser Paschim Medinipur nung voters shilem 90.70-i vote agütsü.

Brihostibarnü Bengal nung district 16 nung election agiogo aser item districts ji Cooch Behar, Darjeeling, Kalimpong, Jalpaiguri, Alipurduar, North Dinajpur, South Dinajpur, Malda, Murshidabad, East Midnapore, West Midnapore, Jhargram, Purulia, Bankura, West Burdwan aser Birbhum district tem liasü.

Bengal nung Special Intensive Revision (SIR) exercise agiba mapang nung mangatettep tulu adoka liasü, ajüsüaka tanü election süngjema agiogo.

Tamil Nadu nunga Karur district nung voters shilem 89.32-i vote agütsü, Salem nung shilem 88.02, Erode nung shilem 87.59, Dharmapuri nung 87.28, Tirupur nung 86.33, Ariyalur nung 83.09, Tiruchirappalli nung 82.76 aser Chennai nung shilem 81.34-i vote agütsü.

Ano külen Gujarat kübok Umreth constituency by election nung voters shilem 54.43-i vote agütsü, Maharashtra kübok Rahuri nung shilem 50.68-i vote agütsü aser Baramati nung voters shilem 52.44-i vote agütsü.

India tesem aika nung kanga tatsük asütsü

New Delhi, April 23 (Agencies): April 23 nungi tenzüka April 27 tashi Northern India aser Central India tesem aika nung temperatures 44°C tashi atutsü, ta IMD-i metetdaksü.

Talisa Uttar Pradesh anüdoklen aser anüolen tsütsü kanga tatsük asütsü aser Maharashtra kübok Vidarbha region nunga temperature 44°C dak tali atutsü, ta IMD-i tekümdangtsü metetdaksü.

Anüngdang tali atsükba dak alia Delhi, Haryana aser Odisha state tem nung aonung-a kanga talem asütsü; tetezü aonunga anisüngzük makatsü, ta parnokisa metetdaksü.

India Meteorological Department (IMD)-i, northern India aser central India tesem aika nung tatsük agi aika timtemtsü, ta metetdaksü.

IMD-i, state aika nung temperature ji average dang nungi 4-5°C agi teimba asütsü;

anüngdang tatsük agi teimtemba sülen aonung-a kanga talem asüba agi anisüngzük mangutsü, ta metetdaksü.

Tatsük agi mejungi kongshitsü aliba states/regions ji- North India kübok Delhi, Uttar Pradesh aser Rajasthan, Central & East India kübok Madhya Pradesh, Chhattisgarh aser Odisha, West India kübok Maharashtra (talisa Vidarbha region) asütsü.

Election sülen toztü jenjang atutsü ta prokba osangji tiyazü: Centre

New Delhi, April 23 (Agencies): Assembly election sülen sorkari petrol aser diesel toztü litre shia sen 25 nungi 28 tashi atutsü ta prokba osangji tiyazü, aser sorkari toztü jenjang atutsü tebilemba mali, ta Brihostibarnü sorkari jangjashitsüogo.

Brihostibarnü Ministry of Petroleum & Natural Gas-i X ajanga, "Petrol aser diesel jenjang atutsü ta osang kar prokdar. Sorkari toztü jenjang atutsü tebilemba mali, ta onoki jangjashitsür," ta metetdaksü.

April 29 tashi nung West Bengal densema state kar nung assembly elections tembangba sülen petrol aser diesel toztü jenjang kanga atutsüa akok, ta Kotak Institutional Equities-i metetdakja liasü.

Tang toztü tazü barrel ka nung dollar sen 120 lir, anungji iba nungji ajemdaker petrol aser diesel litre shia nung sen 25 nungi 28 tashi atutsüa akok, ta Kotak-i metetdakja liasü.

Ministry-i, item ama osangji sensotem aoksadaksütsü atema lir; item ama osangji tai, ta metetdaksü.

"Atangji nungbo, tesüiba küm pezü tsüngda petrol aser diesel jenjang matuba linükji India dang lir. International jenjang atuyonga ibaji ajanga India sensotem mekongshidaksütsü atema India sorkar aser PSUs-i telemteba aika agia inyaker," ta ministry-i metetdaksü.

Taküm February 28 nungi US aser Israel nati Iran amak tenzüka sülen Iran-i rong senzüba tongti lenmang 'Strait of Hormuz' shibang, aser ibaji ajanga toztü jenjang kanga tuogo.

Iran nung rara tenzüka sülen toztü tazü barrel ka nung dollar sen 70 aliba nungi tangbo barrel ka nung dollar sen 119 kümogo.

Tang Delhi nung petrol litre ka nung sen 94.77 aser diesel litre ka nung sen 87.67 lir.

Finland nung Punjab CM-i Punjab nungertem ajuru

New Delhi, April 23 (Agencies): Tang Punjab Chief Minister Bhagwant Mann-i Finland semdanga aliba mapang nung pai, Punjab ya aluyimba, tasen apiteta inyakba aser clean technology nung alima partner ka lir, ta metetdaksü.

Bodhbarnü pai Finland nung aliba Punjab nungertem den jembidang pai bendanglen alir Punjabi nungertem dang Punjab rongsenkettzüng jenjang nung temelenshi adoktsü atema shilem agiang, ta ayongzük.

Mann-i, Punjab nung terenlok mapa kanga kera inyakdar, ta ashiba den külemi bendanglen alir Punjab nungertem dang Punjab nung ano kanga keraa terenlok alitsü atema shisa lemsatepba, invest asüba aser global networks tsütsü shilem agiang, ta mepishi.

Punjab nung AAP sorkari Punjab ya research agiba, chiyungtsü tsütsü tasen apiteta inyakba aser aluyimba tsütsü tiyongtsü tesem ka kümdaksütsü atema international partnerships yanglutsü atema inyaker.

Mann-i, Punjab aser Finland na tsüngda ano taliba amalitepa inyaksü nüngdak, talisa mamatzü, shiruru science aser chiyungtsü wazüka ayuba tsütsü taliba amalitepa inyaksü nüngdak; iba ama partnership ajanga Punjab yimtsüngtem nung rongsenkettzüng jenjang ajungkettsü aser aluyimertem

kanga tajangzük angutsü, ta metetdaksü.

AAP-ia sangdong ka ajanga, "Alima den tesendaktep tashitaitba akümba tetezü Punjab-i ano maongka tuluba angutsü. Mamatsü, nutrition, tasen purapiteta inyakba aser clean technology aintsü atema AAP sorkar, CM @BhagwantMann-i bendanglen aliba Punjabi nungertem den tongteprateper aser Finland den partnerships yanglur. Lanurtem atema kishi lapoktsütsü atema aluyimba ajungkettsü aser research tsütsü amalitepa inyaksü asoshi Punjab-i alima sabang nung mera agia inyaker," ta metetdaksü.

Finland nung Indian ambassador to Finland, Hemant H Kotalwar den senden amenba mapang nung Mann tenati shishilembaba tesendaktep tajungba akümtsü aser rejutem tsüngda taliba amalitepa inyaksü atema o lemtepa liasü.

Iba senden nungji Kotalwar-i manufacturing, engineering aser electronics tsütsü Finland dak tashi tulu aliba metetdaksüba den külemi Finland ya Punjab atema mapang talangka asoshi partner tajung ka asütsü, ta ashi.

University of Helsinki nung Punjab nungi telok kati chiyungtsü aser aluyimba science; talisa mamatzü quality, kiset shiruru, mamatzü dak sendakba technology aser research atema o lemtepa liasü.



April 23, 2026 nü Chennai nung polling station ka nung Tamil Nadu Chief Minister aser Kolathur constituency nungi DMK candidate, MK Stalin aser pa kinüngtsü Durga Stalin nati vote agütsüba sülen tangokba noksa nung angur.


National Human Rights Commission, India
Film Tatsü Tetoktepa-2026

Meimchir temeden ajungkettsüba aser kümzüka ayuba dak sendakba nung NHRC indang 'Short Films Competition-2026' nung shilem agitsü asoshi India sensotem jaoker.

Osang tejangja atema NHRC website www.nhrc.nic.in nungi application form, telatetbatem agizükang aser entry ji online ajanga dang email address: nhshortfilm@gmail.com nung agüjang. Entries agizüktsü atema tatembangbuba anogoji June 30, 2026 asütsü. Osang jangjanüba kar lira tekalen shia aliba email address nung Deputy Director (Media & Communication), **NHRC dangi züluang.**

CBC 53101/11/0003/2627



TIR YIMYIM YIMOBILEM (EDITRIAL)

DIMAPUR FRIDAY, APRIL (RONGCHII) 24, 2026

Ochishir Lanurtem

Nepal nung tang government tasenba nung arishi küm 35 tain lanur Balendra Shah-i aniba government nung yimsüsürtemji lanurtem dang masü saka kanga junga zünga metetba tashitemetetertertem aser akok tashi kanga ochishia nübertem tenzüknertem lir. Atangji, parnok ya Gen Z ta ajaba lanur zünga purtemi anir Nepal nung küm talangka yimten nung taintemi ochimashi mapatem inyakba anema aremer maremtet, tejashi nung ain tulu adoka taoba Nepal ato kilonser K.P. Sharma Oli-i aniba government atsüngdokertem lir. Iba ama ochimashi yimten yimsüsürtem atsüngdoktsü longkak aitba mapang lanurtem rongnung teyirua aika yiru aser tasüa nisung 46 tashi asü. Ibayongji, tang lanurtemi akümba Nepal government tasenba nung kilonsertem asoshi teinyaktsü tongtibangtibaji kechi mapa inyakdir inyakaka ochishia inyaktsübaji lir, kechiyong parnokji ochimashi anema rarartem lir. Atangji, alima nung, talisa yimten nung yimsüsürtem asoshi ochishia inyaktsübaji tasak, saka temerangbo merangdangtsüla. Aji oda, Nepal nung ochimashi anema rarar lanurtemi government kümer ano ita kata majung dang, parnok kilonsertem rongnung nisung anabo pei menden nungi aluogo. Kilonser menden nungi alur ana rongnungji ka, Labor minister, Dipak Kumar Sah-i pa kübok akümba Health Insurance Board nung züngsemtem rongnung pa kinungtsü dena shimba ajanga, pai yimten jenjang topur mejungi kümdaktsüogo ta ser ato kilonseri pa kilonser menden nungi anendaktsü aser ano kaji, Shah-i aniba government nung kilo kilonser (Home minister), Sudan Gurung-bo nübertem senotsü tsütsü pa dak temulung malemba o jembiba agi, iba ken o ji sademsadema bushisüngdangdaksütsü atema yakanü pai pasasa kilonser menden nungi anen. Sudan Gurung yaa arishi küm 38 dang lir aser pa ya Gen Z zünga purtemi Nepal nung ochimashi yimten anema longkak aita Nepal lima ajak anakshia ochimashiba yimten yimsüsürtem atsüngdokertem rongnung lenir ka liasü. Iba temulungtetba nung, pa Nepal government tasenba nung kilo kilonser kümer külen office nung dena mejanga mapa meranga inyaksangji pa liasü. Pa Balendra Shah-i aniba government nung pa den atongba kilo kilonser kümer anogo ishika tsüngda taoba ato kilonser Oli dena pur obendangdak parnok mapang Nepal nung yimten tashi amshia ochimashi mapatem inyakba anema ken o agüja lir. Anogo ishika Home minister inyaker külen, nübertem kari pa akaba senotsü maparen tsütsü temulung melemba jembiba kisüng agi, pai pasasa kilonser menden toktsür ashiba ken o ji, Nepal asoshi dang masü saka asenok ajak asoshi kanga dang tongtibang ken o ka lir. Aji oda, Gurung-i ashiba agi, pa asoshi ochishia shitak alitsübaji office jenjang dang nungi tuluba aser nübertem temulung lemtetba tashi dang nungi tanga tashi tuluba mali. Tanü Nepal nung Gen Z lanurtemi aginübaji ochishia shitak yimsü asüba yimten aser nübertem asoshi khuret bena inyakba yimsüsürtem lir. Tang aliba Nepal government tasenba ya pei nisung 46 taküm dena bendanga agütsüba nung amendaker küma lir, anungji iba government mapaji ochishia yimsü asütsüba dak alaka tanga mali ta Sudan Gurung ashiba o jagi asenok mulungjang nunga jembidaktsüdi. Tanü putu nung iba ama ochishia nübertem asoshi tajung inyaktsütsü bilemba lanur tashitemetetertertem asen lima nunga nungdaker. Atangji, asenokibo parnok amaji taküm ajak bendanga agüjabo meinyaktetsüa akok mesüra ochishia linüba agi yimten nung minister menden nungi peisasabo manennütsüa akok, saka asenok daka ochishia alitsü aser indangindanga yimsü asütsü aser nübertem tenzüksü merangdangba shisatsüba alitsüla. Nübor tenzüksüba mapa nung ochishia tenzüksü merangdang makokbaji otsü balaka saka ochishia yimsü asütsü merangdangtsübajibo toktsür, tamasayongi kenyongi ochimashi inyaktsü bilemba dang yimten nung shilem agi tenzükbajibo, Nepal nung amaji, tajung tazü agibosa matemtsü. Nepal nung lanur yimten yimsüsürtem dang nungi asenok lanu-aen ajak tangazüktsü lesson tulu lir.

OLEMSABANG

AO (NAGA) LIMA NUNG KHRISTAR AROGO TETENZUK OTSU-REN NUNGI ADOKBA KHURET: ASENOKI (ABAM) ANO MANENI REPRANGSHITSU NUNGDAKER.

~ Walu T Imchen

Tanu Ao lima nung Khristar Arogo tetenzük otsü-ren (history) nung Ao Baptist Arogo Mungdang (ABAM) aser Molungyimsen arogo na tsüngda khuret adokba tanü tashi mebendangteti arudagi. Iba khuret mepongdoktetba ya kulitem aika dang alitsü. Iba kuret pongdoktsü asoshi asenoki lenmangtem kar (approaches) ajanga merangdanga aruogo. Kechi tashi maitem (weakness/loopholes) ajanga iba khuret mepongdokteter, item kuli kar zulur.F

I. Iba khuret pongdoktsü asoshi ABAM-i Committeetem shimteter kulitem bushiteba aruogo. Parnoki bushitetba nung ajemdaker telemtetbatem agüja aruogo. Item telemtetba rongnung 1980 küm shimteta toktsüba Research Committee teloki bushitetbaji tongtipang rongnung ka lir. Iba Committee yagi kum pongu (1980-86) tashi kulitem ajak tsutsulen nungi medemdanga bushir 1986 nung parnoki bushitetbatemji ABAM nem agütsü. Iba bushitetba nung ajemdaker ABAM mungdang nung tatempang o (Resolution) yamai agütsü. "Ibai otsüren (history) mapa asünung telemtetba telangtet ka mesüra hai-nunga o ka dang ashitsü tasak aser tamakoktsü....Arogo otsü maparen dak sendakba nungi adokba ken o case ama Mungdangi mesüra kija arogo shingaia mejimbisü; nungdakra zulua aliba kuli-o (document) bushiteptsü akok....Committee bener aruba ama Mungdangi agizuka ayu aser iba ken-o nung Mungdangi kecha shilem (responsible) magitsü ta lemtet." (Ref. 1986 ABAM Mungdang Nov. 4-6 Telemtetba no. 40). Iba telemtetba ya lenmang aisu nung tongtipang lir. (1). Küm 45 (1940-86) tashi documentem nungi ngutetba nung ajemdaker telemtetba agiba lir. (2). Documentem ajak tsutsulen; Missionarytemi zuluba, Molungkimong aser Molungyimsen arogoi zuluba aser ano kijai zulubatem nungi bushitetba lir. Parnoki shinga pu mekümi; telemtang aser telemsa (without bias. Partiality) kecha melie telemtetbaji agütsüogo. (3) Kija (individual) arogo nem pei sasa telemtetba agitsü shilem nungloktsüba (responsible) lir. (5) tatemsa, iba ken o ya *otsü* maparen nung sendakba lir ta bushitet. Item temaba kuli pongu rongnung tongtipang kaji "otsüren nung sendakbaji" lir.

Asenoki küm 45 (1940-1986) tema document palalatem bushitepa iba khuret akoktsü asoshi inyakba mapayim dang "Documentary and Literary Approach" ta ajar. Zulua aliba Documentem nung ajemdaker iba timtem koktetsü (solve) merangba lir. Iba documentary approach ya Theology azünger shia aser talisa Biblical Scholartem tali tajungba metetsü. Kechiaser iba onuk ya Tejen Lai aser Tasen Lai arok-aroka (Critical Studies of the Old Testament and New Testament) bushiba nung azünger. Iba inyakyim yagi kija aser lokti nokdakdak (stand point) temji dang tali tashi itshidaktsua akangshidaktsütsü aser jangjashidaktsütsü, saka yamala khuretemya (controvertial issues) maneptsütetsü, makoktsü aser mebendangtetsü. Kechiaser, yamala inyakyim mapa (ways of approach, system and method) nung tashi mait (loopholes and weakness) aika dang lir. Iba lenmang nung asenok tanu tashi jaja-a arudagi; jokorla iba lenmang-yabo asenoki toktsütsüla. Asenoki ABAM-i lemtet 1986 jagi meyipa lur ken reprangshitsüla aser tenzüksütsüla. Iba khuretya otsüren maparen nungi adokba asünung (historical problem), bushiba yimya tasen tentet historical approach jagi merangdangtsü nungdaker. 1986 küm tashi nung asen Aor Theology azünger M.Th. (Master of Theology) History Department tashi tongteterji Mr. Bendangyabang (Mopungchuket) dang liasü. Tanubu, theology azünger Scholartem aika dang adokogo. Iba historical approach yagi shisatsü aser tanela tangatetba-ren nung tangatetba tasen ka (new understanding) dangi anitsü aser iba tangatetba jagi dang iba khuret pongtoktsütetsü. Iba bushiba -yim yagi documents balalatem (contradictions, defferences) penteta aser medemdanga tesendaktep (reconcile) lenmangtem yanglutsü. II. Tanabuba tashimait ajitetbaji, kodangsa Mungdang kubok yamala khuret, tamangba aser Arogo inyakyim nung (Theological, Doctrinal, Ethical and Historical/theological and non-theological) maparen nung khuretem (issues) adokdir, Ao Theological Association (ATA) nem shilem (responsible) peria agütsütsüla. ATA leniba kübok Church History Department den tanga Department nung Scholartem densema iba khuret lemsateptsü (collective wisdom) nungdaker. ATA bushitetbatem aser telemtetbatem ABAM dangi abentsü. ATA shilemji kechisa? ABAM temzungi kechi ashir, reprangshitsü nungdaker. III. Tasembuba nung; ABAM Temzüng (Constitution) lenmang ajaklen nungi jangja- jangja, rajema aser tabensa nung zulua alitsüla. Mapang aser tensa apir temzüngtem melenshitsü mesüra bendenloka yanglushitsü (revised and update) nungdaker.

O-Tempang _Iba ama tensa (situation) ka nung Ao lima nung Khristar Arogo tetenzük nung sendakba otsutem zulutsü tasak lir. Kechiaser tebilembatem lemsatepdang tali tejashitep dang adoker. Ano tebilemba ajakbo zulutsü makoker, kechiaser kibok -o aser lokti nung jempitsu o-tem balala lir. Ni ama kati Mungdang Temzüng aser telemtetbatem melenshitsü makok; mepishitsüba dang lir. Anungji asenoki ano ken ABAM telemtetba 1986 jagi meyipa lur; ATA nem ken shilem agütsünungbo Tsungremi asenok nem lenmang tajungtiba lapoktsütsü ta amanger. Iba zulu nung tazünger kar danga temolung yirutsüsa aser metokmeperi kar danga zulusema lirapang ku nem meyeipa agujang Temedongshitsü (critics and comments) ajak pelashishia agizüktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur Bible Seminary 68 Buba Graduation sentong agi



Mokokchung, Rongchii/ April 23 (TYO): Impur Bible Seminary 68buba Graduation sentong Rongchii 23, 2026 nü "Ni Yangi lir, Ni yokang" Isaia 6:8 omen süa kanga takok ngua agiogo, ta Impur Bible Seminary Principal, Imtilemla-i sangdong ka ajanga metetdaksü.

Rev. Sentsashi Aier, Senior Pastor, KABA ajanga sentong Omen nung tongti O Jembia liasü. Tsüngremer tajaba ya Tsüngrem aser alima tenzükba tajaba ka lir, aser ibaji tamang agi tashi anga inyaksübaji kanga rongdak lir, ta terenemtet laishirtem dang shia liasü.

Tenzükba nung shibai aja, kechi asoshi aja ta angateta shisatsü temerüktet nung

agizükba ajanga dang wadang nung takok lir. Iba tangatetba nung inyakra, tejang tanga shibai aja Pa tsüngdang asen sentsüh kecha melii pelaseta tia ajak nung bendanga agütsüteta tashi anga tenzükker kaka asütsü ta pelaseta pa wadang inyaksü paisa ajungshia liasü.

Graduating students asoshi bendanga agütsüba sarasadem Rev. Jongpong Pastor Mopungchuket Baptist Arogo ajanga agia Tsüngremer temoatsü aser tatenba meshia liasü.

Ajak agi nisung 46 Diploma in Theological Studies renema liasü. Ms. Sungjeminla, Academic Dean ajanga takok angur, tenüng agüja Mrs Shilula Imchen Chairperson

Board of Governors, Impur Bible Seminary, aser Mrs. Imtilemla, Principal, Impur Bible Seminary ajanga takok anguba kulizüng kaket agütsü. Takok anguba den külemi angazükba nung takok konang angurtem nem sempet tajung agüja, liasü.

Iba sentong Impur Bible Seminary asoshi Tsüngremer lenisüba aser temoatsü ajanga tenzükker tajung jenti molutetba kuli agütsüba sentong ka liasü. "Ni Yangli Lir, Ni Yokang" yimyim bener alima tesem balala nung IBS mangdang bener Tsüngremer wadang tulu inyaksü tajungshiba tulu agüja sentong takok nung tembang. Maneni Pa wadang asoshi IBS Tsüngremi moajangma.

'The Eternal Wall of Answered Prayer' monument yanglu tenzükogo

April 23, 2026: UK nung Birmingham anasa Khristan monument ka yanglu tenzükogo aser iba ya UK nung Khristan monument tulutiba asütsü.

'The Eternal Wall of Answered Prayer' ta ajaba monument ya Birmingham anasa Coleshill nung M6 aser M42 lenmang tsüngda yanglur.

Iba monument ya metre 51 talang asütsü aser 'Angel of the North' den anasü agi talangba asütsü. Iba monument ya lungro million ka amshia yanglutsü aser lungru shiaji Tsüngremi sarasademba langzüba otsü kaka den sendaktepa asütsü; ibaji smartphones ajanga züngtetsü.

Sentong ayongzükertemi ashiba agi, tang tashi nung linük 125 nungi Tsüngremi sarasadem langzüba otsü 120,000 dak tali agütsüogo.

2028 küm tashi nungbo iba monument renemtsü aser public dang sayatsü. Iba mapang tashi nungjibo sarasadem langzüba otsü 250,000 dak tali angutsü imlar.

Iba project atema alima tesem balala nungi nisung 20,000 dak temai tenla agütsüogo aser maneni tenla agütsüdar.

Iba mapatong apiteta tenzüksangji Richard Gamble lir. Pa ya taoba mapang Leicester City football club nung chaplain inyaka liasü.

Küm 20 tejaklen pai iba ya apitet aser 2015 küm nungi pai iba project atema teyari bushi tenzükba liasü.

Gamble-i, "Teimla otsü million ka lemsateptsü aser nisungtemi Yisu metetba den külemi Yisui sarasadem ola angar aser sarasadem langzür ta lemsateptsü atema onoki monument ka yanglu tenzükba atema pelar. Onoki tetsükdaksü aiben ajangshia liasü, aser tang iba mapang ya tetemsü ta ni bilemer," ta metetdaksü.

"Iba project atema nisung meyrjang aikati peii akok yariogo, aser aba atemaji Eternal Wall project-i ajak dang pelar. Onoki iba jenjang tongtetsüsa senjang ka tenlaba shia, ghonda ka tenlaba shia aser sarasademtsüba atema pelar," ta pai metetdaksü.

"Iba mapang ta teimla temaitsü yanglutsü mapang, sarasadem tashi kulisütsü mapang aser asen linük nung Khristan senmang wazüka ayutsü mapang," ta pai ashi.

Iba project ya Snug Architects-i design asü aser parnok ya Royal Institute of British Architects tetoktepa ajanga shima liasü. Tongti contractor ji VSL lir.

Iba monument yanglutsü atema aliji IM Properties-i tenla agütsü, iba dak alia parnoki senotsü tenla-a agütsüogo.

Parnoki ashiba agi, iba monument renemba sülen küm shia nisung 250,000 dak temai iba monument semdangtsü imlar. Iba monument ya ali acre 10 nu yanglur aser yangji gari tanendak, tesemdangertem atema centre ka aser conference hall kata yanglutsü.

Iba project renemtsü atema ano pound sen million 6 jungnüa nungdaksü, ta parnokisa metetdaksü.

Lord Edmiston-i, "Asen linük aser tesem ajaklen nübur ajak dang Tsüngremi ajungba nenshia metetdaksütsü nükjidong nung Eternal Wall yanglur. Iba ya tang putu nung alirtem aser tarutsü nung alirtem dang anüng-alima yanglusang Tsüngremi sarasadem jenti langzüba aser tanü tashi langzüba nenshia ametetdaksütsü atema iba ya nüngshi ka asütsü," ta ashi.

ANOGO ABEN TSÜNGREM DEN

Shidakba temeshi

"O Kibubaji temeshi sobutsü sobur külemang" (t.9). Tsüngremi Pa nübur temeshi südaktsüner. Tejen Lai ibai lepshia aiben amshi. Aser tenyar Peteri pa shiti nung zülu (1Peter 1:16). Iba tetezü pilar, mejaja aser tejangja aliba.

Tebu Tsüngrem, Techir Tsüngrem aser Tanela Temeshi asenok taküm temeshi lidaktsütsü asoshi külemi mapa inyaker. Asenok temeshi lidaktsütsü asoshi asen menen atema Yisu Kangki nung asü. Asenok dak Tanela Temeshi lia Pa ain agi asenok temeshi alitsü ajungshir. Tsüngrem O i asenok temeshiba nung aintsü asoshi yarir. Yisui Tebu dang ashi, "Ne ochi agi parnok meshitetjang; Ne O ochi lir" (Yn. 17:17).

Shidakba temeshiji tebur tajung lir; tiyazü temeshibaji tebur majung. Farisee temeshibaji tiyazü temeshi- pei sasa yangluba temeshi. Shidakba temeshiji Yisu, aser Pai nisung pua aru. Fariseetemi parnokji maginü. Tanela tejangtemji- temeim, tepela, yimjung, taremzük aser tesünep- taküm tobur jungdaktsür.

Shidakba temeshibaji tobur tajung, aser iba tobur tajungji tekülem nungi adoker. Nai shiba külemer pa mesüka na akümer ta nai metetter ma? Ne Tsüngremji merumeruba Tsüngrem süra na merumerua akümtsü. Ne Tsüngremji tobur mejungra naa tebur majungtsü. Shibai sen külemer paji tekuru asütsü. Shibai jangratema külemer, paji tanük asütsü. Saka shibai ochi aser taküm aliba Tsüngrem külemer pa/la ji tobur tajung asütsü- tali, tali Yisu mesüka akümtsü.

Na temeshi taküm alitsü asoshi Tsüngremi ne nem nungdak ajak agütsür. Pa o i na sayudakjang aser Tanela Temeshii na anidakjang. Na Yisu mesüka akümtsüsa liang.

Impur nung Dorka Cell training agi



Mokokchung, Rongchii/ April 23 (TYO): ABAM Women Ministry nung VTPC ajanga maneni ABAM Zone 3 Dorka Cell asoshi training ka Rongchii 21 & 22, 2026 anogotem nung Impur nung kanga takok ngua agia liasü, ta ABAM Executive Secretary, Rev. Temsu Jamir-i sangdong ka ajanga metetdaksü.

Iba training nung Mrs. Chubatola aser Mrs. Kilangkumla House of K Naga tena ajanga chiyungtsü tapu balala yangluba aser sü mejepa

arba sayua liasü.

Iba training ajanga tetsürtem aika pei sasa meranga inyaka lia odar. Tanü pei sasa inyaka aliba tensa ka nung iba training ya kanga tongtipang ka süa VTPC ajanga sentong balala agia aika nokdakteta lir.

Ajak agi Arogo 10 nungi nisung 19 arua dena tangazükba jenti ngua liasü.

Tsüngremi tangazükertem aser tesayurtem aika asoshi tatishitsü süa litetba taküm ka südakjangma ta sarasadem.

AO OSHI ANGAZÜKDAK:

TANÜ ANGAZÜKTSÜBA OJANG



Yaktara

(adj) mapang matongdang (too early)

* Tanü asüngbo antepongi yaktara akonger.

Yaküm

(n) taoba küm (last year)

* Yaküm küm nisung aika asü.

OLONG PAITEP # 7483

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S__ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatemangtiba - (5)
17. Mepupet - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7482 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü, 5. Lenti, 7. Tajangzük, 11. Teronem, 12. Sempa, 13. Jahaz.

Assam nungi BJP candidate ka sen alemba atema West Bengal nung sota ayu

Guwahati, Rongchii/April 23 (Agencies): Assam nung Cachar district kübok Barkhola nungi BJP candidate Kishor Nath, Bodhbar aonung West Bengal kübok North 24 Parganas district nung sota yuogo. Pa ya voter tem nem sen lemstüba atema sota liasü. Osang ajanga ashiba agi, Nath ya BJP candidate Rekha Patra atema nüboyimtsütsü asoshi Hingaljanj-i ao. Pai aonung sen 5,000 lema aliba mapang iba tesem nung alirtemi pa pua liasü. Pa ya pa indang gari nung mener oya aliba mapang sot aser iba sülen Hingaljanj Police Station nungi police tem iba tesemi oa pa sota yua liasü. Iba tatalokba indang video ka social media nung ayimsünga prokshio, aser iba ajanga Assam kübok

Barak Valley aser talisa Cachar district dak ajaki rangloka liasü. Ajisüaka Nath-i pa aitsüba ya magizük aser pai aitsüba kecha tamendakdak maka ta shiogo. Pai ashiba agi, pai temple ka semdangtsü atema iba tesemi ao aser pa meina aoba BJP kübok inyakertemi voter tem nem masü saka kirtan committee ka nem sen 5000 agütsü. Paisa, parnok anemba political party kati pa tenüng menüktsütsü atema iba jenjang ya agi aser osang tai prokshia liasü, ta ashi. Maneni Nath-i, tensa mejungi akümba sülen pai police tem nem osang agüja liasü, ta ashi. Ken o dak sendakba nung police ketdangsurtemi osang tejangja magütsü. Ken o tang bushisüngdang südar.

Manipur: FNCC-i Naga nunger aliba tesem mokdanga ayur

Imphal, Rongchii/April 23 (Agencies): Foothills Naga Coordination Committee (FNCC)-i Manipur nung Naga nunger aliba tesem April 23 nü ayaterem nungi mapang telatet ka makai mokdanga ayutsü tenzüksihiogo. Taoba küm state sorkar den Memorandum of Agreement (MoA) nung sign asüba kanga menoa benoka minyakba atema parnoki iba sentong ayongzükogo. Tensa mejungi küma aoba aser state kübok tesem balala nung security dak sendakba nung kin balalai longkak aita aliba mapang tang ano iba tenokdangba ya agütsüogo. Iba telemtetba agiba sangdongba mapang FNCC-i ashiba agi, osang tejangja ka magütsü tashi senzüsenpong aser rongsenketzüng dak

sendakba nung inyakyim ajak nokdangtsü. Parnoki sorkar dang parnoki nangzükba ama tekaratiba nung jenjang agitsü mepeshia metetdaksüogo, aser parnoki maparen menoa mebenokra iba ajanga nüburtem tali timtemdaksütsü ta tekümdangtsü metetdaksü. Committee yagi ashiba agi, 2025 küm August 8 nü MoA sign asüba state sorkari benoka minyakba ajanga iba longkak aitba sentong ya tenzükdaksü. Iba tenangzüktepba ya Naga nunger aliba tesemtem nung security, ozüng alema inyaksangshiba aser infrastructure dak sendaka lir. Deputy Chief Minister Losii Dikho-i anir sensaksem ka akaba sülen FNCC-i taoba mapang iba longkak aitba sentong ya anena liasü. Tenangzüktepba nung,

Suspension of Operations (SoO) pact kübok aliba Kuki nunger telungpur teloktem Naga nunger aliba tesem anasa amenoktsü mesüra inyaksangshi mesüdaksütsü mulungtepogo. Kasa mapang nung Chief Minister Yumnam Khemchand Singh-i nüburtem dang, terenlok maparen minprongtsü mesüra kin o kin tsüngda telemdang tuluba adokdaksütsüsa jenjang kecha magitsü mepeshia metetdaksüogo. Thoubal district nung lokti sentong ka nung o jembiba mapang pai, yimjung aser tesunep nung alitsü koda tongtibang iba indang lemsatep. FNCC-isa, Naga nunger aliba tesemtem nung alirtem dang iba sentong ya takok ngua benoka inyaksü asoshi teka amteper inyaksü ayongzükogo.

Assam: Punjab Police-i MP Amritpal Singh puogo

Dibrugarh, Rongchii/April 23 (Agencies): Waris Punjab De tekolakba aser Khadoor Sahib atema Member of Parliament Amritpal Singh Brehostibarnü police custody-i yokogo. National Security Act (NSA) kübok pa pua aliba mapang tembangba sülen tang iba jenjang ya agiogo. Punjab Police team kati pa 2023 Ajnala police station amakba ken o dak sendakba nung Dibrugarh Central Jail nung pa pua liasü. Singh indang küm asem atema NSA term April 22 nü ayaterem nung tembanga liasü. Pa ya tepuokdak nungi Dibrugarh Police Station-i police ket nung anogo ana ayutsü atema Brehostibarnü anir ao. Punjab Police, Assam Police, aser Assam Police commando temi pa meiner ao. Sepaitem ya Punjab nungi Deputy Superintendent of Police (DSP) ka aser Dibrugarh Additional SP (Crime) Atul Kumar nati achaayanga liasü.



Amritpal Singh

Pa police ket nung anogo ana ayuba ajanga Punjab Police bushisüngdangertem nem 2023 küm February ita tatalokba dak sendakba nung pa shilem indang ashishitsü asoshi mapang agütsütsü. Iba küm ya nisung telok kati parnok züngsem ka chiokdaksütsü atema police station ya amak aser iba mapang police tem aika yirua liasü. Osangbenertem den sensaksemba mapang Amritpal Singh okatsür Jasbir Kaur-i pa police ket nung ayuba indang

jangatsüogo. Laisa, trial inyakyim ya Punjab nungi video conferencing ajanga agitsü ta metetdaksü. Punjab aser Haryana High Court-i, NSA term tembangba sülen Singh aputsü atema temelaba agütsüba sülen iba jenjang ya agiogo. Singh ya 2023 küm April ita nungi high-security Dibrugarh Central Jail nung yua liasü. Pa nem teyari agütsürtem aika NSA term tembangba sülen Punjab-i anirogo saka Singh ya Ajnala ken o nung aija alirtem rongnung tongtiba lir. Pa Indian Penal Code kübok section aika nung aitsü lir, kong nisung tepsettsü merangba, public servant tem dak züka merenshiba aser criminal conspiracy densema lir. Maneni pa anema Punjab kübok district balala nung FIR 12 shi benoka lir. Pa ya tawa social media influencer Gurpreet Singh tepsetba ken o nunga tenüng tetshio.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND, KOHIMA
INFORMATION
Dated, Kohima, the 20th April, 2026
NO.DESE-9/02/2021:/460
Trainees who have undergone training at various Govt. Industrial Training Institutes, in Nagaland, for the period 2024-25(i.e 1 year course 2024-2025 and 1st year of 2 year course 2024-2026) are hereby informed to apply in the CTSS portal (https://serviceonline.gov.in/directApply.do?serviceId=2600)for availing Stipend, starting from the 21st April, 2026 to 20th May, 2026. Further, trainees who are unable to apply in the above portal may contact / visit their respective Institute for registering in the portal. Failure to apply in the portal at the stipulated time, the concerned authority will not be held responsible.
Trainees of 2nd year of 2 year course (2023-2025 sessions) need not apply in the portal as they are already registered.
Required Documents for registering in the portal:
1. Passport size photo.
2. Front page of Bank Pass Book
3. Govt. ITI Identification Card.
Sd/-
SAVIO VISA
Director.

Strait of Hormuz nung mines yutsüba rong tem amaktsü tuyuogo: Trump

Washington, Rongchii/April 23 (Agencies): Brehostbarnü US Tir Donald Trump-i Strait of Hormuz nung mines yutsüba rong tem dak akhatsü aser tepsettsü United State Navy nem totuyuba agütsüogo ta ashi.

Pa indang Truth Social sapang nung, 'iba totuyuba ya rong mashi, rong tilatem süaka,' ta Trump ashi aser parnok i iba tzü lenmang nung mines yutsür ta aitsü. Pai ano Iran nunger tzyim sepaitem indang rong ajunga tzyim telung nung lir ta ashi.

Trump-i US mine-clearing vessels tem region nung mapa inyaktar aser item mapa asemüsü agi tali inyaktsü totuyuba agütsüogo ta ashi.

Iran indang Revolutionary Guards temi iba strait nung tasazük 1,400 square kilometers nung "danger zone" sangdonga

lir, aser yangji mines tem alitsü akok ta ashir.

Tan ita US Navy temi par rong tem mines indoktsü asoshi iba tzü lenmang leni ogo ta ashi saka Iran indang Revolutionary Guards temi magizüker, shirnoki iba channel ajanga mitkar rong kata mesenzütsü amokmerena lir.

Pentagon-i Strait of Hormuz nung Iran nungeri yutsüba mines ajunga müreksü ita trok agitsü ta asadangteta lir ta osang ka sangdongba Pentagon-i Brehostibarnü aitsüba sülen Trump-i iba sangdong ya agüja liasü.

Bodhbarnü Washington Post nung, House Armed Services Committee züngsemtem dang Pentagon-i ita trok shi agitsü asadangteta lemsatapa liasü, ta ashi.

United States-i par

rongnendak tesemtem mokdanga aliba melapok tashi Strait of Hormuz ya melapoktsü ta Iran-i nangzüka lir.

Chief Pentagon Spokesman Sean Parnell-i, media nung osang temai adokba nungi tajungtem shima prokshiba ya timba tizü lir aser osang abenba nung ochimashi mapa lir, ta ashi.

"Khen asadanga ya shidakba masü, aser Strait of Hormuz ita trok shibangtsü ya tamakoktsü aser Secretary-i khenyongi magizüktettsü," ta Parnell-i ashi.

Iran-i strait telung aser temeket nung mines 20 mesüra tali yuja alitsü, kar GPS technology amshia tzüma nung pongdaka alitsü aser putettsü tasakba kumdaktsür ta ozüing yanglurtem dang ashi, ta Washington Post ajanga shia liasü.

Iran-i Strait of Hormuz madak yimsü asüba tashi sayur

Dubai, Rongchii/April 23 (Agencies); Brehostibarnü Iran-i Strait of Hormuz madak yimsü asüba tashi sayua par commandos tem khu abenba rong tuluka telungi aiba video ka prokshia liasü, koba alima nung tongtipangtiba tzü lenmang lapoktsü teimla nung United States den yimjung ken o jembishinüba chireper atalokba alitsü.

Iran sorkar indang television nung tejak zübanger sepaitem MSC Francesca den speedboat ka nungi lisü agi yangluba apu ajanga rong telungi aiba video ya Bodhbar aonung sayua liasü.

Iba video ya action-movie ama soundtrack dener saka o jembibabo meliasü, kong ano Epaminondas rong-a ngua liasü. Iran-i rong anaprong ya Bodhbarnü puogo ta ashi aser rong ana ya temelaba makai strait ajanga aotsü merang ta aitsü.

Iba strait ajanga senzüba rong tem dang toll meshiba nungi mezüngbuba revenue ya central bank indang account nung inoktsüogo, ta Iran parliament indang vice speaker Hamidreza Hajibabaei-i ashi.

Ajisüaka pai iba toll ya shibai, kodang aser kwi agütsüar mashi. Iran nung obendanger tekolakba Gholamhossein Mohseni-Ejei-ia strait nung amakba shishilempar rong tem ozüing agi melaba ama inyakogo ta ashi. Iran indang speedboats aser marine drones tem asetkong ka anasa sea caves nung jenoka liasü aser US Navy anasai marudaktsür.

United States aser Israel nati February ita rara tenzüka sülen Iran-i iba strait ya shibang, aser hopta ana ceasefire aliba tembangtsü ghonda ishika lia yimjung asoshi tatemsaba jembishinü Mongulbarnü tembangba sülen iba tongtipang tzü lenmang ya Tehran meyong ama yutsür.

US-i Iran indang rong mokdanga magien tashi Tehran-i iba tzü lenmang ya melapoktsü ta ashir, kong alima indang totzü aser liquefied natural gas shilem pongu shi ajanga abener.

Washington-i ceasefire mapang iba mokdang ya benok aser Tehran-i iba mera ya ceasefire nung aibelenba lir ta ashir.

US mitkari Asian waters nung Iran nunger nisan songa aliba tankers asem soita India, Malaysia aser Sri Lanka anasa parnok alidak nungi meyipa yoker, ta shipping aser security osangtem ajanga Bodhbarnü ashi.

US Tir Donald Trump-i asendenshir Iran amaktsü amokmerena aliba Mongulbarnü ceasefire tembangtsü lia agien, saka mokdanga aliba agientsü memulung. Iba ceasefire atsülangba mali aser ano jembishinü akatsü sentong kecha sangdonga mali.

Iba rara indang yimjung ken o jembitsü Pakistan nung ita tetenzüklen ayongzük aser tanaben senden amentsü asoshi renemshiba mapang Mongulbarnü athi, saka parnok tang tashi linük anaprong den osangtsüsang agiteptar, ta Pakistan sorkar osang ka ajanga ashir.

US-i mokdanga aser danga kulitem mechi Iran ketdangsür temi delegation yoktsü memulung, ta Pakistan nunger osang ajanga ashi.

"Yashi linük balala nungi diplomats temi Pakistan lenir balala ajuru aser tarutsü nung jembishinü akatsü asoshi imlaba anogotem indang asüingdang, saka parnok mapang tejangja magütsütet," ta osang ajanga ashir.

Iran-i jembishinü akatsü mulunga lir saka US-i mokdanga aser takhangba balala agütsüba mechi temulung agüja jembishinü akatsü makoker ta Iran-i yimjak nung shia lir. Vice President JD Vance-i aniba US delegation ya Washington nungi mainshi.

"Mitkar tashiyim amshia nai nür nükjidong metongtet aser nai mesüshia itemji metongtettsü. Lenmang ajak agi Iran nübur temeden shidak agizükba ya dang lir," ta Parliament Speaker Mogammad Baqer Qalibaf-i Bodhbarnü social media nung ashi.

Ano United States nung Israel aser Lebanon tsüingta Brehostibarnü tanaben jembishinü akatsü liasü, kong Lebanon yagi taoba hopta ceasefire sangdongba atsülangtsü meranger.

Israel-i Bodhbarnü Lebanon nung amakdang osangbener ka densema nisung pongu tepset. Iran-i rara indang jembishinü nung Lebanon ceasefire ya 'pre-condition' ka asütsüla ta ashir.

Kasa mapang Trump-i secretary of navy ama shimsang billionaire investor John Phelan ya Bodhbar aonung mapa nungi anentsüogo. Rong yangluba tsütsü mangatetep adokba aser Defense Secretary Pete Hegseth densema ketdangsürtem den tesendaktep majungba mechi mapa nungi anentsü ta osangtem ajanga ashir.

Strait nung atsütepa aliba ajanga alima nung totzü tebilemtsü adoka ano jenjang tasakba akumer.

Iba rara tenzükdang Trump-i nükjidong ayuba kata US-i metongtet, yangji Iran-i kidanger linüktem amakba tashi samatsütsü, nuclear programme tembangtsütsü aser par nüburtemi par sorkar temelaba nung atsüngdoktettsüsa kumdaktsütsü densema lir.

Iran ket nung par kidanger linük maktettsüsa missiles aser drones lir aser highly enriched uranium bendena lir, koba tuozük seret 400 dak tema asütsü ta UN atomic watchdog-i asadangteta lir.

fssai **Eat Right India**

Shidakba Organic Products tem Jagjatetba

Yaser nai organic products tem alidang,

Item maitsü ya reprangang

Jaivik Bharat logo reprangang

Item logos kabo alitsüla:

National Programme for Organic Production (NPOP) | Participatory Guarantee System (PGS)

Nü indang "Organic" chiyongtsü ya shidakba organic asü??

O ya kisüing mereprangi - label ya jangjang...!

Yaser nai lijaliyongdang, nai chichiba organic produce alitsü asoshi tamang katetba marks tem reprangang.

Kumdanga Aliang, Chiyongtsü Tajung Chiang.

#HarLabelKuchKehtaHai...

fssaiindia fssai fssai_safefood fssaiindia fssai_india

State Food Safety Authority,
Department of Health and Family Welfare, Govt. of Nagaland

For any consumer grievances, mail us @: foodsafety.nagalandhelpline@gmail.com

9buba Kohima District Shooting asayamung ayonger

Kohima, Rongchii/April 23 (TYO): 9buba Kohima District Shooting competition 2026 May 2 nü Kire Farm (Chiin-Ca) nung asayatsü.

Iba asayamung ya Kohima District Shooting Association tawabangba kübok asayatsü aser Kohima District Rifle Association-i ketdang asütsü.

Iba asayamung 9buba nung 10m Air Rifle (tetsür aser tebur-Jr/Sr), 10m Pistol (tetsür aser tebur Jr/Sr), 50m .22 Rifle Open sight (Open) aser 40m (.177 caliber) Bench Rest.(Open) asayatsü renema lir.

10m Air Rifle (tetsür aser tebur-Jr/Sr) aser 10m Pistol (tetsür aser tebur Jr/Sr) Category atema entry fee sen

500 asütsü. 50m .22 Rifle Open sight (Open) category atema entry fee sen 1000 agitsü telemtetba agiogo.

Kasa mapang nung 40m (.177 caliber) Bench Rest (Open) category atema entry fee sen 2000 asütsü.

Form agizüka benoktsüba ya online aser offline ajanga sütettsü.

Entry form ya Sports World, Kohima Town, Pfonuo Shop, DBS Junction, Kohima Village aser Kitsu Pan Shop, D.Khel Kohima nung angutsü.

Entry form den entry fee benoktsü atema tatabangbuba anogoji April 30 nü nikonngtsütsü 4:00 ako tashi

asütsü. 10m tetoktepba nung category ana alitsü- Junior arishi küm 15 aser tekübok aser senior arishi küm 15 tema.

Shooter tem shirnoki iba asayamung nung takok tajung ngudir parnok taruba State Inter-District Shooting Championship nung Kohima District Team tenüng nungi asayatsü. Iba asayamung ya 2026 küm June ita Aries Sports Complex, Dimapur nung asayatsü.

Osang tejangjaba agitsü atema item number; 9856569364, 9436005636, 7005429309 ajanga t o n g t e p r a t e p t s ü metetdaksüogo.

Premier League: Manchester City temaba jenjangi tuogo

Rongchii/April 23, 2026 (Agencies): Bodhbarnü Turf Moor nung Burnley pur goal 1-0 agi akokba sülen Manchester City pur Premier League table nung temaba jenjangi tuogo, aser kasa mapang nung Burnley pur relegate süogo.

Asaya nung minute pongububa nung Erling Haaland-i goal ka idaktsüba sülen parnoki asaya koka parnoki Arsenal ajatetogo. Team anaprongla yagi point kasa ngua lir aser goal difference-a kasa dang saka City-i goal timba idaktsür lir. Asaya kokaka par team-i iba dang nungi goal timba idaktsütettsür alitsüba sernung midaktsütetba atema manager Pep Guardiola-i pa tezü adangba lemsatepa liasü.

Manchester City-i asaya kanga junga tenzüik aser Rayan Cherki-i metsüba ball ka Martin Dubravka-i kanga junga nokdang, ajisüaka mapang tatsüka dang lir Haaland-i goal ka idakja liasü. City puri maneni nongshia asaya saka parnoki

goal midaktsütet. Asaya nung Erling Haaland-i metsüba ball ka post nung ondak aser Burnley atema-a Zian Flemming-i goal idaktsütsü asoshi maongka anguba magitet.

Burnley puri season tepeyong nung asaya 34 nung point 20 dang ngutetba sülen parnok relegate asütsü jangjaigo.

Tang agi season pongububa Burnley pur relegate süli promote süli ta asaya arudar aser parnok Premier League aser Championship nung melentepa asaya arudar.

Kasa asayamung nung Leeds United aser Bournemouth na goal 2-2 agütsür asaya tembangba sülen Bournemouth pur European asayamung asayatsü asoshi timla aliba nung tetsükdaktsü adokogo.

Season tembangtsü game pongu anunga lia takoker tang tashi mejangjai lir aser Arsenal dang nungi City pur asaya tasakba anunga lir.

Mitchell Starc Hokolbarnü Delhi Capitals nung adentsü



Rongchii/April 23, 2026 (Agencies): Cricket Australia-i temelaba agütsüba sülen fast bowler Mitchell Starc Hokolbar anepdang Delhi Capitals nung adentsü renema lir. Arishi küm 36 tain asayar ya tekatsüla aser tapu yiruba ajanga masayai liasü, saka tang pa DC pur May 1 nü Rajasthan Royals den asayatsü aliba asaya nungibo shilem agi tenzüiktsü imlar.

Osang ajanga ashiba agi, DC ketdangsurtemi pa den tongtepratepa aruogo aser pa April 20 nü tashi nungbo squad nung adentsü ta meteter liasü. Axar Patel-i aniba team yagi

tang tashi nung asaya asem kokogo aser asaya asem mekoki lir.

Starc team nung adentsüba osang ya kanga tajung saka pa asaya metenzük tsüingda parnok IPL 2026 playoff qualification atema jenjang junga kümdaktsütsü asoshi Punjab Kings aser Royal Challengers Bengaluru na den asayatsü aliba asaya ya akoktsü nüngdaker

Starc team nung adenba ajanga asayartem melenshitsüsa akümtsü, kechiyong parnoki bendanger asayar pezü ya kanga junga

amshitsü nüngdaker. Pathum Nissanka, David Miller, Tristan Stubbs, aser Lungi Ngidi nung asaya aruogo, saka Starc aruba sülen ketdangsurtem tekolak menütsü.

Parnok ket nung options aika lir aser Sahil Parakh ya kobika masayadaktsüi toktsütsü ta bilemer. Arishi küm 18 tain left-hander yagi pre-season camp nung kanga junga asayaogo aser pa yakta top-order nung asayaba angutsü imlar.

Pre-season nung asayaba mapang pai kecha tetsübu makai asayaba ajanga asayar tejentema puaogo. Pai Mukesh Kumar, T Natarajan amala bowler temi aonba ball ayong ayonga asaya liasü.

Starc ya squad nung Hokolbarnü adentsü, saka pa RR den asayatsü aliba asaya nungiang asaya tenzükdaktsütsü imlar. Pa taoba season asaya 11 nung asaya aser iba mapang pai wicket 14 agi. Pa May 1 nü nungi asaya tenzükra pa asaya trokbo asayatsü aser pai team asoshi temelenshi bener arutsütsü imlar.

Chelsea-i caoch Liam Rosenior mapa nungi anentsüogo



Rongchii/April 23, 2026 (Agencies): Chelsea-i head coach Liam Rosenior mapa nungi anentsüogo. Pa den küm trok atema tenangzüktepba yangluba sülen ita pezü tsüingda pa mapa nungi anentsüogo.

Chelsea pur Premier League nung asaya pongu tashi goal ka danga midaktsüi tamakok anguba sülen iba telemtetba agiogo. Tetoktepba balala ajak nung Chelsea pur asaya ti nung asaya tenet nung tamakok nguogo aser iba ajanga manager aser club lenirtem tali nongshia liasü.

Rosenior ya Strasbourg (Chelsea kibur meyong club) nungi January ita Enzo Maresca melena anir aru.

Ajisüaka Brighton pur goal 3-0 agi makokba sülen pa mapa nungi anentsütsüsa aküm. Chelsea-i sangdong ka ajanga manager den pilaba lemsatepogo.

"Chelsea FC nung ajak tenüng nung onoki Liam aser pa indang staff tem nem parnoki club atema meranga inyaktüba atema pelaba lemsateper. Iba telemtetba agitsü ya club atema

temela masü asü, ajisüaka season nung ano asaya aika asayatsü anunga lir aser tawa team asayaba yimya ya imlaba dang nungi tamajungba. Chelsea FC nung ajaki Liam tarutsü takok nung aotsü imlaja atar," ta club sangdong ajanga metetdaksü.

Assistant coach Calum McFarlane lenisüba nung season nung tanungba asayatem asayatsü. Maresca mapa nungi anentsüba mapanga-a pai iba mapa bena liasü aser pa lenisüba nung Chelsea pur Manchester City goal 1-1 agütsür draw asü aser Fulham goal 2-1 agi mekoki liasü.

Pa lenisüba nung Chelsea pur Leeds United den FA Cup semi-final asayatsü. Parnok tang league nung jenjang tenetbuba nung lir aser asaya pezü asayatsü anunga lia Champions League asayatsü asoshi point tenet nüngdaker.

Chelsea kibur melenba sülen sen aika entokdar, saka takok tajung monguteti arudar. Iba den bendenloksema Rosenair-i club toktsüba ajanga Chelsea pur sen crore 300 shi akoktsütsü.



April 23, 2026 : China kübok Sanya nung 6buba Asian Beach Games asayaba mapang Nepal o Chinese Taipei na beach Kabaddi asayadang Nepal tsür Rabina Chaudhary-i (tachichi nungi mezüngbuba) shilem agiba noksa nung angur.

BILEMDANGANG
"Tesüiba dak dang rangloker lira tejakleni aotsü tasak asütsü."